

Schaff mat Naturmaterialien

Et ass am Moment weiderhi wichteg sech ze beweegen an genuch frësch Loft ze kréien. D'Natur kann der nei Kraaft an Energie gi fir all deng flott Iddien ëmzesetzen.

Dofir sollt der des Woch am HomeScouting eraus an d'Natur goen a mat Naturmaterialie flott Saache bastele – mat der Natur a fir d'Natur.

E Kranz aus Spackelter

Et geet erëm ëm d'Villercher. An den Dierfer a Stied, wou manner Beem an Hecke stinn, fannen eis kleng Frënn manner z'iesse an dëst zemools, wann et dobausse fréiert.

Spackelter ass eng flott Ofwiesslung fir d'Villercher a mat dëser klenger Bastel kënnst dir eppes Guddes maachen, eng kleng BA fir d'Déieren, an zousätzlech nach Deko fir an de Gaart oder op d'Dier.

Pass just op, dass wann s du de Spackelter sammele gees : Looss den Déieren aus der Géigend och Friichten iwwreg, an esou der Heck d'Méiglechkeet als natierlech Fudderquell wieder ze bestoen.

Villercher déi besonnesch gären, méi mëllt Fudder iesse sinn: D'Rotkehlen, den Zaunkönig, d'Märel an de Stär.


Du brauchst:

- Drot
- Spackelter
- Eng Nol oder en Zännstocher
- e flotte Putsch oder Änleches als Dekoratioun



Pick elo de Spackelter an der Mëtt duerch an Hänk en un en Drot. Deen kanns du duerno als Krees, Véiereck, Dräieck oder souguer als Häerz un deng Dier, deng Heck, däi Bam oder däi Balcon hänken.

De Villercher e gudden Appetit an dir e grouse Merci.



En Bild mat Eecheldeckelen

Wann mer lo erëm e bësselche méi doheem sinn. Ass et dach flott, eist Doheem nach méi schéin ze maachen. D'Beem hunn bal all hier Blieder verluer an och d'Friichte maachen sech raren op den heemesche Beem.

Elo kanns du dech op de Wee maachen an d'Deckelen oder d'Hitt vun den Eechele sammele goen. Domadder hëls du och kengem Quaichlek säin lesse fort, mee kanns awer kreativ ginn.

Du brauchts:


- Eecheldeckelen
- Päsch oder eng Peschpistoul mat Päsch
- e wäisst Blat
- e Bläistëft
- e schwaarze Stëft fir d'Kaweechelchen auszemolen
- Gedold



Mol der e groust Kaweechelchen op e Blat an mol et mat engem decke schwaarze Bic faarweg. Esou ass de Kontrast tëschent dengen opgepechten Deckelen an dem Kaweechelchen net esou grouss.

Dann probéiers du esou no wéi méiglech di verschidden Eecheldeckelen opzepechen an esou d'Form vum Quaichlek auszufüllen.

Wosst du, dass Kaweechelcher, sech elo am Summer an Hierscht e grouse Stock un lessreserven op verschiddene Stoppen uleeë fir dann duerch de Wanter ze kommen. Och si freeën sech awer heiansdo iwwert e Snack aus dengem Gaart. Vlächst hues du jo nach Iddien, wéis du och de Kaweechelcher iwwert de Wanter hëllef kanns. Hei sinn Hieselnëss, Walnëss, Sonneblummekären, Wuerzelstécker oder Uebst wéi Äppelstécker besonnesch beléift. Opgepasst! Dat soll ni um Buedem leien, soss kann en hongregt Kaweechelche vun engem Déier aus der Noperschaft erschreckt ginn.



Vulleklacken aus verschiddene Materialie vun doheem

D'Villercher fannen heiansdo, wann et dobausse ganz kal ass, de Buedem gefruer ass an all d'Kären an d'Uebst scho fort sinn, näischt mi ze knabberen. Dofir ass et schéin a wichteg, dass mir eise klenge Frënn ënnert d'Flilleke gräifen.

Du brauchs:

- Kokosnossfett (oder anert Planzefett)
- Ficelle
- en Zännstocher oder eng Picknol fir Lächer
- Kären (Sonneblummekären (Geschielt oder net geschielt), Mëschungen)
- e Gefäss (eng al Taass, e Blummendëppen, eng Bakform, eng Orange, eng Kokosnossschuel...)
- en Zännstocher oder eng Picknol fir Lächer




D'Fett gött an engem Dëppe lues erhëtzt an d'Käre gi lues a lues drënner gemëscht, bis d'Kären all mat dem waarme Fett bedeckt sinn. Bei ze wéineg Fett, fält duerno leider alles auserneen.

Dann félls du deng Mëschung an däi Gefäss vun denger Wiel. Looss alles ofkillen (a kanns et souguer am Frigo kuerz fréiere loossen). Wann et kal genuch do baussen ass, kanns du et an d'Beem an der Géigend ophänke goen! D'Villercher freeën sech bestëmmt, a wann s du der ganz vill Méi gëss an et flott dekoréiers, bréngt et och nach Faarf an de Wanter.

Opgepasst: Géi deng Fudderklacke sichen, wann se eidel sinn, esou vermeits du d'Verschmutzung vun der Ëmwelt





Fudderstatione fir d'Villercher aus recycléiertem Material

Wann s du schnell, ëmweltbewusst an einfach en Fudderhäische fir d'Villercher am Gaart bastele wëlls, dann ass dat hei genau dat richtegt fir dech.

Mat engem klenge Geste an engem Grëff an deng Valorlux-Tut huet du schon alles wat's du brauchts:

- en Tetrapack-Kartong
- en Cutter oder eng Schéier
- Hëlze Bengelcher als Sëtzmeiglechkeet
- eng Ficelle
- Käre fir d'Villercher





Huel deng TetraPack-Këscht a mol dir fir, wat s du ausschneide wëlls. Dann hëls du de Cutter oder d'Schéier a schneits di Dealer aus, déi als Entrée fir an däi Fudderparadäis solle genotzt ginn.

Pick een oder zwee Lächer duerch den ieweschten Deel vun denger Këscht an zéi eng Ficelle oder en Drot derduerch. Esou kanns du däi Fudderhäische bequem iwwehall ophänken.

Do drënner picks du 2 Lächer, fir den hëlzene Bengelchen ze befestegen. Dann félls du däin Tetrapack mat Kären.

Opgepasst: Géi deng Fudderhäisercher sichen, wann se eidel sinn, esou vermeits du d'Verschmutzung vun der Ëmwelt.



www.favorettecreativi.com